

Hset Mahno...

1

Bàu achoh

¹ Kan mahno da Chuaq Jesus Christ , Boc Plinh ma khoe am deh ka haq òeq hu paqnoh ka hapõng haq jah loq rìm yiniq ma rêntrù trùh tangèa kô èh , qmang aih haq khoe thê deh bình plinh loh patinh ka Jon , aih hapõng da haq . ² aih la mangai anoe hlài bàu Boc Plinh xam kan panhìn da Jesus Christ , taboe hlài rìm yiniq òeh ma khoe hnoq . ³ Xôq ramot am ka mangai òeq xam mangai tamàng bàu pajàu kô , wèq tiaq rìm nà ma khoe achih ta kô . Majah qmang aih khoe haqnap trùh dèh jò .

Bàu achih am ka tapèh Tagop Hadròeh gùng Asia.....

⁴ Jon achih am ka tapèh Tagop Hadròeh oe ta Asia :

Waiq kan tabòeh dech xam kan catèm am ka oh daq trùh enh Mangai qnang i , khoe i , i yòt mòeq òeq , xam enh tapèh yiang oe enh ngèa gèq da haq , ⁵ xam enh nòe Chuaq Jesus Christ aih Mangai panhìn ùh tablòq manoh , aih Kon ramua khoe rih hlài enh kan cachit òeq broq cla craq bòe bùa ta crõng tanèh .

⁶ Mangai loq waq ka bèn , khoe yòc deh mahim qnheo hreo yiniq lui bèn, broq kabèn wia diac da haq , wia pajàu Boc Plinh aih Baq da haq , kan ranhòm , kan i cwiang itai oe diq ta haq mòeq òeq ! Amen .

⁷ “ Ngan kô , haq wih hlài tacô xam yùc plinh ,

rìm mat diq jah hnoq ,

yac ka mangai ma bit haq ji hadai ,

dìq òeq ka nang noe ta crõng tanèh crò hmoe ka haq” Joq qnàng qmang aih ! Amen .

⁸ Chuaq aih Boc Plinh , Mangai qnang i , khoe i èh i hloe mòeq òeq aih Mangai i cwiang diq òeq , doe : “ Au kô Anpha xam Ômega” .

Kan mahno am ka Jon jò oe ta pleo Bat mô

⁹ Au kô Jon , aih oh daq bèn , mangai mòeq bua ka pì ta kan ranac , enh dalam ka Chuaq Jesus Christ hadai chiùq àt chiùq gòm diac plinh , au khoe oe ta pleo Bat mô aih taiq bàu Boc Plinh xam taiq anoe au panhìn ka Chuaq Jesus . ¹⁰ Wop hì da Chuaq , au jah Yiang Hadròeh qnang , au tàng dèh enh rù i bàu dèh tiaq ka bàu ken , ¹¹ doe rameh : “ Achih qmùt ta hset bòe yiniq ih ma hnoq , èh gòe aràng ka tapèh Tagop Hadròeh oe ta Êphêsô , Simiacno, Betgam , Thia-tiro, Sade , Phila-đenphi xam Laođi-sê .

¹² Jò aih, au hwi enh rù òeq hu ngan bàu capoch ka au aih iq bàu cabô , ¹³ bu tawih , au hnoq tapèh toq jènh òeq broq xi wang , taqne bòe jènh òeq aih i cabô meh tiaq ka kon ngai , caxùnh eo

yôh trùh ta jo , caxi qnam broq xi wang kàt ajang rada . ¹⁴ Xàc ta gàu haq taboc tiah ka xàc trùu , taboc qmang ka hiloc , mat haq qmang ka ùnh , ¹⁵ jènh chah qmang ka ðùng khoe ram ta tanùh , bàu qmang ka bàu diac kàn . ¹⁶ Kǒng pah haq qma cadop wê tapèh toq halǒng , enh hacùng loh mòeq pla chang hin baiq mản , hadrò qmang ka mat mahi jò ma qngah diq jaq . ¹⁷ Bu hnoq , au tabùng cro ajang jènh haq tiah ka mangai cachit ; mahaq haq yǒc tì pah qma bèq chac au , rai doe : “Apaq yùq cleq !au kô Mangai ma adroe xam Mangai ma atiq dǒng , ¹⁸ Au Mangai rih , au khoe achit mahaq manòeq kô ngan beq au rih mòeq ðòe , wèq gahlòng da kan cachit xam nòe mangai cachit oe .

¹⁹ Qmang aih , drah achih rìm yiniq ìh ma khoe hnoq , bòe yiniq ma qnang i manòeq xam bòe yiniq padon trùh ta atiq kô èh , ²⁰ aih la bòe kan bahlèp da tapèh toq halǒng ìh khoe hnoq enh kǒng pah qma au , xam da tapèh toq jènh ðen wang . Tapèh toq halǒng aih bình plinh da tapèh Tagop Hadròeh , tapèh toq jènh ðen aih tapèh Tagop Hadròeh” ..

2....

Achih ka Tagop Hadròeh Êphêsô.....

¹ Achih ka bình plinh da Tagop Hadròeh Êphêsô rameh: Kô bàu da Mangai kǒng pah qma haq ma wê tapèh toq halǒng rai cadiang lam taqne tapèh toq jènh ðen wang : ² Au loq yiniq broq da ìh , au ji loq kan xalep , kan loq kềm da ìh ; au loq ìh ùh jùh jùn ka mangai dù , au ji loq ìh khoe qnhro bòe mangai ma doe ðeh kô broq mangai tiaq cla , ìh khoe jah hnoq joq qnàng aih bòe mangai ti patiah . ³ Ìh loq kềm rai chiùq xalep ka yiniq au , ùh hìaq tagah lep . ⁴ Mahaq i yiniq kô au cwò ka ìh , aih ìh khoe cađac kan loq waq jò baxèm . ⁵ Qmang aih, hmàng hlài beq ðeh khoe cro ajang leq , drah raxach rai boq hlài ðeh yiniq ìh ma khoe broq enh jò baxèm ; ùh meh au trùh ta ìh , tàng ìh ùh raxach aih èh au ðèch ðac da ìh ðen khoe ka nòe da haq . ⁶ Mahaq ìh i mòeq yiniq kô ma yi wìa , aih iq ìh git ka yiniq broq da bua Nicôla , yac ka au hadai git . ⁷ Cabô i don , drah tamàng bàu Yiang Hadròeh anoe ka bòe Tagop Hadròeh : Mangai leq blêq , au jah am wì haq acaq pli long kan rih oe ta Parađi da Boc Plinh .

Achih am ka Tagop Hadròeh Simiàc-no....

⁸ “Achih ka bình plinh da Tagop Hadròeh Simiàc-no rameh : Kô bàu da Mangai ma adroe xam Mangai ma pulùch dǒng , Mangai khoe cachit yàng mahaq khoe rih hlài : ⁹ Au loq kan xalep , kan pa hamoq da ìh , (yac ka ìh padrǒng kan) , xam bòe bàu capoch patah , capoch qmèq enh bòe wì ma doe ðeh kô mangai Juđa , ma joq qnàng aih ùh xài , wì haq aih mòeq bua ka tagop da Satan . ¹⁰ Ìh apaq yùq ka rađeh ep glàm kan nanxa . Au doe ka ìh loq , kô èh taqne pì qmat Satan padon rùp clêh bàc ngai ta hnim cadrong , ðòeq hu qnhro ngan pì , pì glàm kan nanxa ta mòeq jàt hì . Ep wèq manoh ùh tablòq trùh cachit , aih èh au hi am ka pì cadoh kan rih da diac plinh . ¹¹ Cabô i don , drah tamàng bàu da Yiang Hadròeh anoe ka bòe Tagop Hadròeh : Cabô blêq , kan cachit yàng atiq kô èh pì broq cleq ka haq aih jah .

Achih ka tagop Hadròeh Becgam

¹² Hadai achih am ka bình plinh da Tagop Hadròeh Becgam rameh : Kô bàu da Mangai i pla chang hin baiq mản : ¹³ Au loq nòe ìh qnang oe qmat gèq da satan ; ìh khoe wèq cajap manoh ta yiniq au , ùh cađac manoh lúi ajang au ; yac ka jò Antiba , aih mangai diq ka manoh anoe panhìn

ka au khoe cachit deh ka wi jêh đac tanòe pì , aih nòe Satan oe . ¹⁴ Mahaq i nòe au cwò ka ìh : Majah qmang aih , ta qmat pì i mangai tiaq trong da Bala-am , aih mangai ma hnài Balac roh hmo catoeh enh qngèa mangai Isorali , òeq padô wi haq acaq jam tadreo kiach chòc rai ti adràc wi haq ti tango taqnung . ¹⁵ Ta ìh qmat hadai i mangai cadiang tiaq bàu trong da Nicôla . ¹⁶ Qmang aih , drah loq raxach beq , tàng ùh meh , au rênhr trùh ta ìh , yòc deh chang enh hacùng òeq hu tajêh ka wi haq . ¹⁷ Cabô i don , drah tamàng bàu Yiang Hadròeh doe ka rìm Tagop Hadròeh : Mangai leq blêq , au am ka haq mana ma qnang cadoc hlêp , au hadai am ka haq pliang raga taboc , ta ai i achìh mòeq toq yiniq neo , enh gùng ka cla mangai jah ùh i cabô loq .

Achìh ka Tagop Hadròeh Thia-tiro

¹⁸ Ìh hadai achìh ka bình plình da Tagop Thia-tiro rameh : Kô bàu capoch da Kon Boc Plình , aih Mangai mat tiah ka ùnh , jênhr tiah ka òùng ma chah òiq cajaq : ¹⁹ Au loq yiniq broq da ìh , kan loq waq da ìh , manoh lùì ìh , trong patih òiq ka manoh da ìh , manoh loq kêm da ìh , bòe yiniq ìh broq ta atiq kô kiang èh kiang bàc yeo loe ka angoe , ²⁰ Mahaq yiniq au ma cwò ka ìh , aih i oe jùh jùn ka Jêsaben , mangai cadri aih cla haq doe deh kô pajàu , toq ti hnài rai padô hapông au , òeq hu aluàn wi ta kan tango anang , acaq jam tadreo . ²¹ Au khoe am ka haq i jò òeq hu loq raxach , mahaq haq ùh raxach dèh kan tango aih . ²² Kô èh au khwênhr haq ta juàng jìq hiang hloe xam bòe mangai wiang tango ka haq , tàng wi haq ùh raxach trong yiniq lui aih , au hadai khwênhr caqnh wi haq ta kan ranàc kàn . ²³ Au jêh ka cachit bòe kon da haq ; aih èh rìm Tagop jah loq au kô Mangai loq ta manoh cliac kon mangai , èh au hi tiaq qmòe tang yiniq rìm ngai khoe broq òeq hu patem chau ka wi haq . ²⁴ Mahaq pì xam wi qnoeq ma hahdai oe ta Thia-tiro , ùh tiaq trong aih , qnhòq qnì deh kan tai cliac Satan , qmang ka wi haq ma anoe dèh yòt , aih au tanap ka pì au ùh taqmòq tam ka pì kan trap qnoeq . ²⁵ Toq pì ep wèq ka cajap bòe yiniq deh ma khoe i , trùh jò au trùh . ²⁶ Mangai leq blêq , broq tiaq manoh au trùh lùch trùh gèh , aih èh au am ka haq cwiang òeq broq gàu bàc diac . ²⁷ haq wèq cwiang xi long dùi mem, tùq bahech bòe diac aih budàng abòq taneh, qmang ka au khoe jah cwiang aih enh nòe Baq au. ²⁸ Au am ka haq aih halông sroq . ²⁹ Cabô i don , drah tamàng bàu Yiang Hadròeh anoe ka bòe Tagop Hadròeh !

3...../

Achìh ka Tagop Hadròeh Sacđe.....

¹ Ìh achìh ka bình plình da Tagop Hadròeh Sac-đe rameh : Kô bàu da Mangai carùp wê tapèh yiang da Boc Plình xam tapèh toq halông : Au loq yiniq broq da ìh , ìh i qmòe tiang doe rih mahaq cachit . ² Drah riu beq! drah broq ka cajap hlài bòe yiniq ma oe i , aih bòe yiniq ma oe toq hu cachit, majah qmang aih , enh ngèa Boc Plình au ùh i hnoq ìh broq yiniq cleq ma gèh geo . ³ Qmang aih hmàng hlài beq ! ìh khoe jah yòc khoe jah tàng qmang leq , thê cajap tiaq qmang aih rai loq raxach beq. Tàng ìh ùh drah riu , au trùh tiah taiq ka mangai lam atùng , ìh ma qnì jò leq au trùh rùp ìh. ⁴ Mahaq ta Sac-đe oe i biah ngai qnhòq hiaq broq amùa deh ka eo yòh : Wi aih èh jah caxùnh eo taboc hu lam ti au , majah qmang aih wi haq tajì ka jah qmang aih . ⁵ Mangai leq blêq , jah caxùnh eo taboc qmang ka wi aih . Au ùh xùt đac yiniq mangai aih loh khoe ka hset kan rìh , mahaq au creò ràu yiniq haq aih enh ngèa Baq xam enh ngèa bòe bình plình da Haq . ⁶ Cabô i don , drah tamàng bàu Yiang Hadròeh anoe ka bòe Tagop Hadròeh .

Achìh ka Tagop Hadròeh Phila-đenphi

⁷ Ìh hadai achìh ka bình plình da Tagop Hadròeh Phila-đenphi rameh : Kô bàu da Mangai hadròeh ,Mangai hnhuh jang , Mangai i khoaq da Đawit , Haq hi pèch pi i cabô oe jah clênh , Haq hi clênh pi i cabô oe jah pèch : ⁸ Au loq yiniq broq da ìh , au khoe pèch mòeq toq qmang enh ngèa ìh , ùh i cabô jah clênh ; majah qmang aih au loq ìh biaoq ðeh padren , mahaq khoe wèq bàu au , ùh hangah ðac ka yiniq au . ⁹ Au am ka ìh biaoq ngai oe tagop Satan, wì haq doe radeh kô mangai Juda , yàng ma joq qnàng aih ùh xài , wì haq capoch qnùt , kô èh au broq ka wì haq thia bla op ðeh ta jènh pì , aih èh dôq wì haq loq au khoe loq waq ðeh ka ìh . ¹⁰ Pàng ìh khoe dràng cajap wèq tiaq bàu thê da au, kềm manoh jò glàm nanxa, au hadai wèq ìh claih kan qnhro kàn padon trùh jàp ta crông taneh aih la jò ðòeq qnhro ðiq ðông ka mangai. ¹¹ Au rênh trùh , drah wèq bòe yiniq ìh khoe i , ðòeq ùh hiaq i cabô jah yôc da ìh cadoh lem diac plình . ¹² Cabô blêq , au jah am haq broq jrang ta hnim kùh waiq Boc Plình au , aih èh wì haq pi talah enh aih hòm; au jah yôc yiniq Boc Plình au , xam yiniq plài Boc Plình , aih Jerusalem maneo ,(Jerusalem ma loh enh plình , loh enh Boc Plình au) xam yiniq neo da au ðòeq hu achìh ka wì haq . ¹³ Cabô i don , drah tamàng bàu Yiang Hadròeh anoe ka bòe Tagop Hadròeh .

Achìh ka Tagop Laođixê :

¹⁴ Ìh hadai achìh ka bình plình da Tagop Hadròeh Laođixê rameh:

Kô bàu da Mangai Amen , aih Mangai panhìn ùh tablòq manoh joq qnàng , haq aih broq cla craq rìm yiniq Boc Plình ma broq loh enh jò baxèm : ¹⁵ Au loq yiniq broq da ìh , ìh ùh hangeo hadai ùh tôq , Au ngèh ka ìh hangeo tàng ùh meh tôq ðông aih yeo hnau hòm ! ¹⁶ mahaq ìh toq ha-onh , ùh tôq ùh hangeo , dài au majah laq qnoh ðac ìh . ¹⁷ Cla ìh doe : Au padrông , au khoe kan , pi oe nhet cleq hòm ; yàng ìh ùh canau ka ðeh kô hrah hrôm , nanxa , pa hamoq , lua mat rai ta talùch chac dech . ¹⁸ Au pariaq ìh drah rot enh au wang ma khoe bùh ta ùnh , ðòeq ìh jah padrông kan, rot bòe blah eo taboc ðòeq hu caxùnh , qmang aih èh kan camaih kan rahòng ìh jah taqmàn cadoc , rot jreo ðòeq xùt mat dôq ìh hujah xau hnoq . ¹⁹ Mangai leq au ma loq waq ðeh aih au cwò au hnài ; qmang aih drah i manoh loq nhet , loq raxach . ²⁰ Hacô , au yòng enh gùng rai clôq qmang ; tàng i cabô tàng au bàu rai loh pèh qmang ka au , aih èh au mùt pajùm ti haq , acaq ti haq , haq acaq ti au . ²¹ Mangai leq blêq , au am haq haqngui ti au ajang nòe gèq da au , tìah qmang ka au khoe blêq jah haqngui ti Baq au ta gèq haq ²² Cabô i don , drah tamàng bàu da Yiang Hadròeh anoe ka bòe Tagop Hadròeh !

Bòe yiniq Boc Plình mahnu am ka Jon jah hnoq ...

4

¹ Khoe aih , au ngan hnoq , i mòeq toq qmang tapèch ta plình , bàu au tàng yàng ma baxèm haq ranòq tiah ka bàu ken doe ka au : Drah tồc tacô , au hu am ìh hnoq rìm yiniq ma ep trùh atiq kô èh . ² Tajòe qmòe jò aih Yiang Hadròeh mùt ta au , au hnoq i mòeq toq gèq ta plình , ta gèq aih i mòeq Ngai qnang haqngui ta aih . ³ Haq ma haqngui ta aih qngah qmang ka ngỗc hmu lang xam ngỗc mainau , i rawiang hađong qngah qmang ka ngỗc nget gwian dudan ka gèq . ⁴ Dudan ka gèq i tam baiq jàt pôn toq gèq hòm , ta gèq aih au hnoq baiq jàt pôn ngai gucraq haqngui , caxùnh eo taboc gàu wì haq kui cadoh broq xi wang . ⁵ Enh gèq aih i bòe kan camlet xam bòe bàu cađah ; xam tapèh toq ðen bùh qngah qngai enh ngèa ka gèq : Aih raq tapèh yiang da Boc Plình . ⁶ Enh ngèa ka gèq i diac raxiq hliang qmang ka guàng , taqne xam dudan ka aih i pôn toq

ngè rih , enh ngèa ,enh rù , ajang leq xôq i mat . ⁷ Ngè rih ma baxèm tiah ka sutùh , ngè rih ma hatia tiah qmang ka bo calô , ngè rih ma atiq hòh tiah ka hadrò mangai , ngè rih ma pulùch tiah qmang ka cliang kèn qnang pan . ⁸ Pôn toq ngè rih aih , rìm toq dìq i tadràu toq panan , dudan enh gùng xam enh dalam ka chac haq dìq i mat ; dahì damang ùh jò leq hêq ka doe :

“ Hadròeh ,Hadròeh , Hadròeh

aih la Boc Plinh i cwiang itai rìm trong .

Adroe khoe i , manòeq qnang i, atiq èh dua i !

⁹ Jò pôn toq ngè rih aih yõc bàu manè hu dèch kan ranhòm ka haq ma qnang haqngui ta gèq , aih Mangai ma rih halinh mòeq òe . ¹⁰ jò aih baiq jàt pôn ngai gucraq bla op enh ngèa ka Mangai ma qnang haqngui tagèq bùa , rai kùh waiq haq ma rih halinh mòeq òe ; khoe aih doeh deh cadoh enh gàu òe ta haqneq enh ngèa ka gèq bùa rai doe

“ Waiq Boc Plinh aih Chuaq da nhèn ,

Ìh tajì òe jah kan ranhòm , kan rahù xam cwiang itai ,

majah qmang aih ìh khoe broq loh rìm yiniq ;

tiaq deh manoh ìh enh , rìm yiniq men khoe i , men khoe jah broq loh” .

Hlìa hset canua

5.....

¹ Khoe aih au hnoq , ta kǝng pah qma Mangai ma haqngui tagèq bùa i mòeq toq hset achìh enh dalam xam enh gùng , hset kǝ khoe i tapèh toq teo nìm padràng . ² Au hadai hnoq mòeq bình plinh ma dèh padren crèu cadèh : Cabô ma tajì òe pèh hset kǝ èh rai doeh bòe nìm pateo kǝ ? ³ Yac ka ta trǝc ta taneh , hloe enh caqnàm taneh dua pi oe i bô jah pèh ngan , loq oe jah chri ngan enh dalam hset canua kǝ hòh . ⁴ Pàng ùh i qmòe ka cabô ma tajì ka jah pèch jah chri ngan enh dalam ka hset canua aih hòh , dài au majah toq hmoe diac mat loh da dahràc . ⁵ Jò aih i mòeq ngai taqne wì gucraq doe ka au : Pi dùh hmoe , hatau , sutùh da xinoe Jùda , aih hamǝng da bùa Đawit , khoe blêq , Haq aih jah pèch hset qmat rai toeh tapèh toq nìm padràng qmat . ⁶ Khoe aih au hnoq , Kon Triu yǝng qne Gèq bùa , èh pôn toq ngè rih xam bòe wì gucraq oe dudan haq ; Kon Triu qmang ka khoe cachit ka wì jêh đac , Kon Triu i tapèh toq haki xam tapèh toq mat , aih raq tapèh yiang da Boc Plinh ma thê loh lam jàp crǝng taneh . ⁷ Kon Triu cadiang trùh , yǝc hset ma oe ta tì pah qma da Mangai ma haqngui tagèq bùa . ⁸ Jò Haq yǝc hset , pôn toq ngè rih xam baiq jàt pôn ngai gucraq dìq bla op enh ngèa Kon Triu , mòeq ngai wê mòeq toq broc xam bòe cabi wang ta aih tah bình gahnàu xua thùm ; aih la bàu waiq khàn da bòe mangai da Boc Plinh . ⁹ Wì haq calêu boe maneo rameh : “ Ìh tajì ka yǝc hset , rai doeh bòe teo nìm ; majah qmang aih ìh khoe chiùq cachit , yǝc deh mahim cla òe hu baxon ka Boc Plinh ,bòe mangai ta rìm xinoe , rìm bàu capoch , rìm adrech , rìm diac , ¹⁰ Haq broq wì aih wìa diac da bùa , wìa pajàu patih ka Boc Plinh bèn ; wì aih jah broq mangai pagàu ta crǝng taneh .

¹¹ Khoe aih , au ti ngan , au tàng haraya bàu da bình plinh bình ka muàn ka jàt muàn . Wì dudan ka Gèq xam bòe ngè rih xam bòe gu craq .¹² Pajùm ti dabau wì haq capoch cadêh :

“ Kon Triu ma khoe chiùq cachit ,

taji ðòeq jah kan itai , padrông , rabiaq loq , jah padren dêh ,

jah padêch haqnhêq , jah ranhòm xam bàu manè !

¹³ Atiq ka aih au tàng rìm yiniq ma khoe jah broq loh oe ta plinh , ta crông tanêh , ta caqnàm tanêh , ta diac raxìq , xam rìm yiniq ma oe ta aih ðiq anoe rameh : “ Waiq ka Mangai ma haqngui tagèq bùa xam Kon Triu jah bàu manè ênh , jah kan padêch haqnhêq , ranhòm xam kan i cwiang itai mòeq ðòe ! ¹⁴ Pôn toq ngè rih ðiq doe “ Amen” . Êh bòe gucarq hi bla op ta haqneq ðòeq kùh waiq .

Doeh teo nìm ma baxèm.....

6.....

¹ Au ngan hnoq , jò Kon Triu pèh nìm ma adroe ta tapèh toq nìm , au hnoq i mòeq ta pôn toq ngè rih capoch bàu qmang ka atêh hilùng : “ Trùh beq” ! ² Au ngan hnoq , i mòeq toq axêh mông . Mangai haqngui ênh crông axêh i mòeq toq panên ; i mangai am ka haq mòeq toq cadoh bùa , èh haq lam tiaq taiq ka mangai ma khoe blêq , lam pang leq blêq pang meh .

³ Jò Kon Triu pèh nìm ma baiq , au tàng bàu ngè rih ma baiq doe : “ Trùh beq” . ⁴ Tajòe qmoè jò aih loh mòeq toq axêh gòh . Mangai haqngui ta crông axêh i cwiang dèch ðac kan catèm loh khoe ka crông tanêh , ðòeq kon mangai wì tajêh ðac dabau , èh i mangai am ka haq mòeq pla chang kàn .

⁵ Jò Kon Triu pèh nìm ma piq , au tàng ngè rih ma piq doe : “ Trùh beq” . Au ngan hnoq i mòeq toq axêh gam . Mangai haqngui crông axêh tì haq wê mòeq toq kìq . ⁶ Au tàng taqne pôn toq ngè rih loq tadroq i bàu doe “ Mòeq kìq qmau mì tech mòeq ðoniê , piq kìq qmau mat nha tech mòeq ðoniê , khoe ka aih dàu xam alac ðôq haq apaq troq .

⁷ Jò Kon Triu pèh nìm ma pôn , au tàng ngè rih ma pôn doe “ Trùh beq” . ⁸ Au hnoq loh mòeq toq axêh nget bah bah . Mangai haqngui ta crông axêh , yiniq haq aih Kan cachit , i hwinh clam tiaq gít ênh rù haq . Wì haq i cwiang mòeq phàn pôn ta crông tanêh , ðòeq jêh ðac kon mangai xi chang , xam kan pangot hrah , xam kan jìq dài , xam bòe ngè dù ta crông tanêh .

⁹ Jò Kon Triu pèh nìm padam , au hnoq ta caqnàm prang tadreo i bòe mahua da bòe mangai ma khoe cachit taiq wì haq tiaq trong Boc Plinh xam bàu wì haq ma lam anoe . ¹⁰ ðiq ka wì haq crêu qmoè cadêh “ Waiq Chuaq nhèn , aih Mangai Hadròeh, Joq qnàng , ìh oe taqnàh gòm trùh jò leq hòmen men hadrah rai patem chau bòe mangai ta crông tanêh ma khoe broq ta-ùc mahim nhèn ? . ¹¹ I mangai am ka wì haq mòeq ngai mòeq blah eo yôh taboc ; èh i bàu doe ka wì haq ep gòm tam toq biaq hòmen , trùh jò leq hi jah tòm bài mangai ma hadai wiang abroq , ma hadai ep cachit qmang ka wì haq ðiq.

¹² Au ngan hnoq , jò Kon Triu pèh nìm tadrâu , aih taneh loh kan ralàng kàn , mat mahì loh ka clam cluiq qmang ka caxop bai xác gam , mat khê tìah ka mahim . ¹³ Bài halõng ta tróc clìh taqneq , tìah ka plì hra tagoe long hadrùih jò cayêu hlui dèh . ¹⁴ Tróc ka canua hlài qmang ka wì canua hset broq xam akia , bài búi wang xam bài pleo diac hadai haprah hangai deh ka nòe oe ; ¹⁵ bài bùa ta crõng taneh , bài cwan kàn , bài cla craq lình , bài mangai padrõng , mangai i cwiang , mangai hapõng díc , mangai broq cla diq cadàu lam amot roc ralùng , roc kòp hmo kàn ta wang . ¹⁶ wì doe ka búi wang doe ka hmo kàn : Thê clìh enh qnhèq ka nhèn kô beq , dõq nhèn jah hlèp khoe ka hadrò Mangai ma haqngui tagèq bùa rai jah claih ka kan nòeh da Kon Triu ! ¹⁷ Majah qmang aih hì panuq kàn da haq khoe trùh , cabô ma oe dràng yòng ? .

Boc Plình hadro òe q deh bòi hapõng

7

¹ Khoe ka aih, au hnoq i pôn bình plình yòng ajang pôn toq mùm taneh , tì wì haq rùp padràng pôn qngèa cayeo , dõq ùh hìah i cayeo hlui ta taneh , ta diac raxìq , tagoe long . ² Au hnoq hòim i mòeq bình plình qnoeq , tõi enh apah mat mahì loh , tì haq wê ngè pateo da Boc Plình ma rìh halinh . Haq dèh bàu crêu rai doe ka pôn bình plình ma khoe jah cwiang òe q broq kan hãbo ka taneh xam diac raxìq . ³ “ Apa q broq kan hãbo ka taneh ,ka diac raxìq xam bài long trùh jò leq bèn khoe pateo hadro ta ngòng bài hapõng da Boc Plình bèn . ⁴ Au tàng , bài mangai majah pateo hadro aih jah : 144.000 ngai loh enh bài xinoe Isorali ;

⁵ Enh xinoe Juda jah : 12.000 ngai ;

Enh xinoe Rubên jah : 12.000 ngai ;

Enh xinoe Gat jah 12.000 ngai ;

⁶ Enh xinoe Ase jah 12.000 ngai ;

Enh xinoe Neptali jah 12.000 ngai ;

Enh xinoe Manase jah 12.000 ngai ;

⁷ Enh xinoe Sime-ôn jah 12.000 ngai ;

Enh xinoe Lêwi jah 12.000 ngai ;

Enh xinoe Ysaca jah 12.000 ngai .

⁸ Enh xnoe Sabulôn jah 12.000 ngai ;

Enh xinoe Jôsep jah 12.000 ngai ;

Enh xinoe Bêjamin jah 12.000 ngai jah pateo hadro .

⁹ Hi khoe ka aih, au hnoq bài mangai haraya rayúc , pi bô oe diq rên , loh enh rìm diac , rìm xinoe , rìm gùng , rìm bàu capoch ; wì haq yòng enh ngèa ka gèq bùa xam enh ngèa Kon Triu , caxùnh eo yôh taboc , tì wì haq wê hamenh hla hanoc , ¹⁰ wì haq creo cadêh :

“ Kan dèch claih loh enh Boc Plình bèn ,

aih Mangai ma haqngui tagèq bùa ,

Xam enh Kon triu” .

¹¹ Dìq dõng bình plinh yòng dudan ka gèq bùa , dudan ka bài gucraq hloe xam pôn toq ngè rih , kùp deh hadrò enh ngèa ka gèq bùa rai kùh waiq Boc Plinh . ¹² wì doe :

“ Amen ! Bàu manè enh , kan ranhòm , kan rabiaq , kan manè apôi , kan tajì , kan itai xam padren dêh ,hlài dìq ta Boc Plinh bèn mòeq ðòeq ùh lùch ! Amen” .

¹³ Jò aih i mòeq ngai gucraq bòch au : “ Dìq ka mangai ma caxùnh eo yôh taboc qmat ìq cabô , wì haq trùh enh leq ? ¹⁴ Au padreo bàu “ Wì craq ! Ìh loq trong aih” . Haq doe ka au “ Wì haq qmat aih la bài mangai ma khoe loh enh kan nanxa kàn , khoe rùh , khoe broq dèh eo jah taboc ta mahim Kon Triu . ¹⁵ Qmang aih , dài wì haq majah haqngui enh ngèa ka gèq bùa Boc Plinh , dahì damang jah patìh ta hnim kùh waiq da haq ; Mangai ma haqngui tagèq bùa jah wèq ban wì haq . ¹⁶ Wì haq pi pangot , pi croh ranõng hòm ; pi i ka mat mahì ,pi i kan tôq enh leq oe jraq wì haq . ¹⁷ Majah qmang aih Kon Triu oe taqne gèq bùa jah rai ban rai ajèn qnung wì haq trùh ta bài crõng diac rih ; Boc Plinh jah xùt dìq dõng diac mat wì haq .

Nìm ma tapèh , Pôn bình plinh hlui ken

8 ,.....

¹ Jò Kon Triu pèh nìm ma tapèh , ta trõc hatinh jah qnah qne jò .² Au hnoq tapèh ngai bình plinh yòng enh ngèa Boc Plinh , i mangai am ka wì haq tapèh toq ken . ³ Khoe aih i mòeq bình plinh qnoeq trùh yòng ajang prang kùh waiq oe enh ngèa ka gèq bùa , haq wê abôq broq xi wang , haq jah bacc gahnàu , ðòeq dèch atõc gahnàu aih taprang kùh waiq broq xi wang enh ngèa ka gèq bùa pajùm ti bàu waiq khàn da bòe mangai Boc Plinh . ⁴ Nhòe linh gahnàu enh ti bình plinh aih , pajùm ti bàu waiq khàn da bòe mangai da Boc Plinh pan tõi trùh enh ngèa Boc Plinh . ⁵ Khoe aih bình plinh wê abôq wang yõi ùnh enh prang kùh waiq tah bình ta aih ,khoe aih hwênh qnìh ta crõng taneh : Tajõe qmòe jò aih i bòe atêh hilùng dêh , cađah , camlet xam kan taneh ralàng . ⁶ Tapèh bình plinh wê tapèh toq ken hi padon hlui .

⁷ Bình plinh ma adroe hlui ken , trõc loh ka clih preo i xam ùnh clai pajùm ti mahim dahrôq loh ta crõng taneh . Mòeq ta piq phàn taneh loh ka ùnh cheo , mòeq ta piq phàn bài long , ùnh cheo dõng , rìm adrech nhat cheo dìq .

⁸ Bình plinh ma baiq hlui ken : i kan cato kàn tiah taiq ka bui wang kàn xi ùnh hwênh qnìh ta diac raxìq . Mòeq ta piq phàn diac wìa mahim , ⁹ mòeq ta piq phàn ngè rih ta diac raxìq cachìt dõng , mòeq phàn piq bài boang loh ka raliang.

¹⁰ Bình plinh ma piq hlui ken , aih i mòeq toq halõng kàn clih enh plinh , cheo loh qmòe pla ùnh qmang ka hiloeh hadreo ; halõng aih clih ta mòeq phàn piq crõng diac xam goe diac . ¹¹ Yiniq halõng aih : Cachiq xang , mòeq phàn piq crõng diac loh dõng ka xua qmang ka cachiq xang , broq ka bacc ngai cachìt , majah qmang aih diac khoe loh ka xang .

¹² Bình plình ma pôn hlui ken , mỏeq phàn piq mat mahi pi qngah , mỏeq pàn piq mat khê xam mỏeq phàn piq bài halõng hadai , dỏq mỏeq phàn piq bàikan qngah aih loh dỏng ka clam , ðẻoq jỏ ðahì hnhung mỏeq phàn piq kan qngah , damang hanoh .

¹³ Jỏ aih au ti ngan , au tàng bầu cliang kền pan taqne trỏc rai crẻu cadẻh : Hỏbỏ qnẻng ! hỏbỏ qnẻng ! hỏbỏ qnẻng ! ka bài mangaima rih ta crẻng taneh , majah qmang aih oe i bầu ken ða piq bình plình qnoeq ma padon hlui hỏm.

9

¹ Bình plình ma padam hlui ken , aih au hnoq mỏeq toq halõng enh plình clẻi ta crẻng taneh , khoe jah am ka halõng aih khwaq ða hvinh jrủq ùh lủch , ² Halõng aih pẻch hwin jrủq ùh lủch aih , i nhẻo enh qneq pan ta atỏc , tẻah ka nhẻo ða tanủh kản ; mat mahi xam hỏe cayẻu loh dỏng ka clam ka nhẻo enh hwin jrủq . ³ Enh nhẻo aih prai loh bài lip pan jỏp ta crẻng taneh ; i mangai am ka wẻi haq cwiẻng tẻah qmang ka agỏt ta taneh . ⁴ I bầu ùh lỏh wẻi haq apaq troq ðac bài nhat oe ta crẻng taneh , enh long qyoh trủh long kản , mahaq jah troq ðac toq bài mangai ta ngỏng wẻi haq ma ùh i ka teo ða Boc Plình . ⁵ Ềh am ka wẻi haq cwiẻng ùh xẻi ðẻoq hujẻh ðac , mahaq ðẻoq toq pani bài mangai aih ta padam khẻ , kan baxa aih tẻah ka jỏ agỏt kap . ⁶ Ta bài hẻi aih , kon mangai chaq kan cachẻt mahaq chaq ùh jah ; wẻi tangẻh ka jah cachẻt yẻng kan cachẻt wẻa ðac ka hangai .

⁷ Bài lip aih tẻah ka axẻh khoe padon ðẻoq hu lam tajẻh tablah : Tagẻu wẻi haq i cadỏh bủa tẻah taiq ka wang , mủh mat haq qmang ka hadrỏ mangai ; ⁸ haq i xẻc qmang ka xẻc gẻu gucadrẻ , hanenh haq qmang ka hapỏh sutủh . ⁹ Haq i caqmỏc qmang ka caqmỏc mem , atẻh panan ða haq tẻah ka atẻh bẻc toq xẻ ma i bẻc toq axẻh ðủi tủh loh tanẻo tajẻh . ¹⁰ Tẻnh haq i nỏc qmang ka agỏt , haq yỏc tẻnh aih ma baxa pani kon mangai ta padam khẻ . ¹¹ Haq i bủa pagẻu , aih mangai ða hwin jrủq , bầu Hẻbru ðỏe : Abẻỏn , bầu Grec ðỏe Abỏliỏn .

¹² Kan ranẻc ma adỏe bu khoe ; manẻoq kỏ oe i tam baiq kan ranẻc trủh atẻq ka aih hỏm .

Bình plình ma tadrẻu hlui ken

¹³ Bình plình ma tadrẻu hlui ken , aih au tàng i bầu loh enh pỏn toq haki ða prang kủh waiq broq xi wang ma ðẻoq enh ngẻa ka Boc Plình . ¹⁴ Bầu aih ðỏe ka bình plình ma tadrẻu qnang wẻ ken : “Drah caqnaih pỏn bình plình ma qnang bẻi kẻt ðẻoq ta crẻng ðiac kản Ophorat beq” . ¹⁵ Pỏn bình plình aih khoe rap gỏm ðẻoq waq toq hẻi troq ðẻh jỏ , hẻi , khẻ ,hanam , jah caqnaih hu lam jẻh caðac mỏeq ta piq phàn kon mangai .

¹⁶ Lẻnh kỏe axẻh ða bài lẻnh aih rẻn jah baiq hrinh trủuq ; aih sỏq au ma khoe tàng . ¹⁷ Axẻh xam mangai kỏe axẻh au ma hnoq takan mahnỏ aih qmang kỏ : Bài wẻi aih ðẻi caxủnh eo jỏp gỏh qmang ka ùnh , mau nget gam , mau ðrinh ða liu hwẻnh ; gẻu axẻh tẻah ka gẻu sutủh , hacủng haq caprỏh loh ùnh , loh nhẻo xam liu hwẻnh . ¹⁸ Mỏeq phàn piq kon mangai cachẻt ka piq kan ranẻc kỏ aih : ùnh , nhẻo , xam liu hwẻnh loh enh hacủng axẻh . ¹⁹ Majah qmang aih cwiẻng itai ða axẻh aih oe jang hacủng xam ajang tẻnh haq , bài tẻnh aih tẻah qmang ka bẻh , i gẻu , wẻi haq yỏc ðẻh gẻu aih hu ti jỏh mangai .

²¹ Bài mangai ma oe rih , aih bài mangai ma ùh hìaq cachit ka bài kan ranac aih , dua ùh raxach hu cađac bài ngè tì kông wì haq ma broq loh , dua toq kùh waiq kiac chōc xam radua qmù broq xi wang xam bac xam ðùng , xam hmo , xam long aih bài kan cato qmù ùh qnì hnoq , ùh xau tàng , ùh qnì lam . ²² Wì haq ùh raxach ka jêh mangai , ka blòeh blōng , ka tango , atùng .

Bình plình wê hset canua .

10

1 Khoe aih au hnoq mòeq bình plình ma qnoeq padren dêh raya , loh enh plình , i yùc dudanh ka haq. Tagàu haq i rawiang hađōng ; hadrò haq tiah ka mat mahi , jènh haq qmang ka jrang ùnh . ² Tì haq wê mòeq toq hset qyoh khoe hlia ðòeq , jènh pah qma haq jôiq diac raxiq , jènh pah qngeo jôiq tagùng , ³ Haq creo mòeq nà cadêh qmang ka bàu sutùh ca-ùm ; khoe ka bàu haq creo i tapèh qmang hilùng . ⁴ Jò i tapèh qmang hilùng aih , au enh achih yōc , yàng au tàng i bàu enh plình doe “ Nìm padràng ðòeq bàu da tapèh qmang hilùng aih doe cleq , ùh dùh achih cadêh ” .

⁵ khoe aih , bình plình au ma hnoq haq yòng tadiac xam tagùng , dèch tì pah qma ta trōc , ⁶ haq patô Mangai ma rih halinh mòeq ðòe , aih Mangai ma broq loh plình xam rìm yiniq oe ta plình , broq loh taneh xam rìm yiniq ta taneh , broq loh diac raxiq xam rìm yiniq ta diac raxiq , ðòeq hu hapah “ Khoe ðiq ka jò ” . ⁷ Mahaq trùh hì bình plình ma tapèh am tàng dèh bàu rai hlui ken , aih èh kan hlèp da Boc Plình jah gêh geo , wop qmang ka haq ma khoe doe deh ka bài hapōng haq aih la bài mangai pajàu .

⁸ Khoe aih bàu au ma khoe tàng enh plình doe hòm ka au “ Lam beq , yōc hset qyoh ma tapèch ajang tì bình plình ma qnang yòng ta diac raxiq xam ta taneh ” . ⁹ Au hì lam trùh ajang bình plình , au bōch haq am ka au hset qyoh . Haq doe ka au “ Yōc beq khoe èh hì lōnh hset kô beq ; ta cliac ìh haq xang , mahaq ta hacùng ìh nhim qmang ka diac xùt ” ¹⁰ Au yōc hset enh tì bình plình khoe au hì lōnh ; ta hacùng au haq nhim qmang ka diac xùt , mahaq jò au khoe lōnh haq loh ka xang ta cliac . ¹¹ I bàu doe ka au “ Ìh oe raq ep capoch bàu pajàu ka bàc xinoe , bàc diac , bàc toq bùa hòm ” .

11

¹ I mòeq ngai am ka au mòeq catoch triang niaq tiah ka long wêh maneh, rai thê au “ Yòng beq , wêh hnim kùh waiq da Boc Plình , prang tadreo , rên xam bài mangai kùh waiq ta aih ” . ² Mahaq hamlang enh gùng ka hnim kùh waiq aih cađac , apaq wêh broq cleq majah qmang aih nòe aih khoe hataq ka mangai diac qnoeq , dōq wì jôiq padit plài hadròeh aih wop jah pôn jàt baiq khê . ³ Khoe èh au hì am cwiang itai deh ka wa baiq ngai ma lam anoe panhìn da au , wa aih caxùnh eo bai briang lam capoch bàu pajàu ta 1.260 hì . ⁴ Wa haq , aih raq baiq toq long ôliu , aih raq baiq toq jènh ðen ma yòng enh ngèa ka Chuaq da crōng taneh . ⁵ Tàng cabô enh tabroq ka wa aih , aih èh i ùnh loh enh hacùng wa bùh ðac mangai ma tagit ka wa : Mangai leq tabroq ka wa , ep cachit qmang aih .

⁶ Wa aih i cwiang clênh qmang plình, ðòeq trōc ùh mè ta bài hì wa capoch bàu pajàu ; wa aih i cwiang thê diac wìh wìa mahim rai broq bàc kan ranac ta crōng taneh , enh broq jò leq dua jah .

⁷ Jò wa aih khoe gêh ka lam anoe panhìn , aih i ngè rih tồc enh hwinh jrùq , tajêh ka wa haq ; ngè rih aih blêq wa haq , khoe êh jêh đac wa . ⁸ Hanang wa haq wì taqngùi đac ti trong lam da plài kàn , capoch apriah aih raq Sôđôm xam Êđiptô , nòe Chuaq da wa haq ma khoe tiang đing talong pagat . ⁹ Mangai oe rìm nòe ta crông taneh , rìm xinoe , rìm bàu capoch , rìm diac điq jah hnoq hanang wa aih ta piq hì qne , wì ùh lòh catùh hanang aih ta ralùng . ¹⁰ Bài mangai ta crông taneh lem bùi rahêh rahah acaq ôq , qnèp aràng ka dabau dahwèq jò hnoq wa khoe cachit , majah qmang aih baiq ngai pajàu Boc Plình kô khoe broq ka mangai ma rih ta crông taneh bacc kan ranàc. ¹¹ Mahaq atiq ka piq hì qne aih , i hì hèm rih enh Boc Plình mùt ta wa baiq ngai aih : Wa aih padinh yòng qmòe ka jang , bài mangai ma hnoq wa điq jaq cadròt crè . ¹² Wa tàng i bàu enh plình creo ka wa “ Tồc tacô ” Wa tồc ta trồc enh dalam ka cato yùc kàn , rìm ngai ma tablêq ka wa điq hnoq . ¹³ Wop jò aih taneh loh kan ralàng kàn , mòeq phàn mòeq jàt da plài kàn ralòeh đong , tapêh muàn mangai cachit ta kan ralàng aih , bài mangai ma oe rih hnoq qmang aih loh ka cadròt , rai dèch bàu manè apôi Boc Plình ma oe ta plình .

¹⁴ “Ranàc” ma baiq bu khoe ; kô “Ranàc” piq rênh trùh !

Bình plình ma tapêh hlui ken

¹⁵ Bình plình ma tapêh hlui ken , ta trồc i bài bàu dèh , anoe rameh

“ Pang kô bài diac da crông taneh kô hi wìa diac Boc Plình bèn xam Christ da haq ,
Haq broq bùa mòeq đòe” .

¹⁶ Baiq jàt pôn gucraq qnang haqngui dèh tagèq dudan ka Boc Plình , điq kùp ta haqneq , kùh waiq Boc Plình , ¹⁷ Wì doe rameh

“ Nhèn dèch bàu manè apôi Ìh , Boc Plình ma i cwìang itai rìm trong ,
aih Mangai manòeq qnang i , enh nêh khoe i ,
majah qmang aih tì kông Ìh khoe wê cwìang điq jaq haqnèq ,
Ìh khoe broq bùa

¹⁸ Bài diac tacrông taneh plôh nòeh , mahaq kan nòeh da Ìh khoe trùh ,
Manòeq khoe trùh jò , aih jò đòeq hadrah mangai cachit ,
hu baha ka hapông da Ìh aih bài pajàu ,
hu baha ka mangai da Ìh xam bài mangai loq iu yùq yiniq Ìh ,
baha ka mangai kàn xam mangai qyoh ,
đòeq raliang đac mangai ma khoe broq raliang crông taneh”

¹⁹ Jò aih hnim kùh waiq Boc Plình ta plình hi tapêch , wì hnoq Hom Tajao ta hnim kùh waiq Haq , khoe aih i bài kan camlet , i atêh tagruàng , bàu cađah , i taneh ralàng xam mè clih cato preo kàn .

Mangai gucadri oe jiang xam bìh kàn

12Khoe ka aih , ta tróc i mòeq kan halac kàn : Mòeq ngai gucadri i mahi oe dudan ka haq , enh jènh haq i mat khô , tagàu haq i cadoh bùa broq xi mòeq jàt baiq toq halõng . ² Haq aih oe jiang , crò hmoe xalep ka jìq hauang . ³ Ta tróc hadai loh mòeq kan halac qnoeq hòim : Aih moeq toq bìh kàn gòh tabrùng , haq i tapèh toq gàu , mòeq jàt toq haki , tagàu haq i tapèh toq cadoh bùa . ⁴ Tênh haq hua mòeq phàn piq halõng ta tróc , lam caqnìh ta crõng taneh ; bìh aih rap enh ngèa ka mangai gucadri qnang jìq hauang , waq toq kon nga clih enh cliac , haq hi lõnh . ⁵ Mangai gucadri aih hauang mòeq ngai kon calô , kon calô aih yõc long dùì mem òeq wèq cwiang enh qnhèq ka rìm diac ; kon calô aih jah òh atóc ta Boc Plinh , ta gèq cla haq . ⁶ Mangai gucadri ti amot tanòe hawit , ta aih haq khoe i nòe Boc Plinh palauq qmòeq , òeq haq ban raðeh ta 1.260 hi .

⁷ Jò aih i kan tajêh ta plinh : Michen xam bài bình plinh da haq tajêh ka bìh kàn , bìh kàn hadai xam bài bình da haq hadai tajêh chau . ⁸ mahaq wì haq ùh blêq , aih majah pi hnoq nòe da wì haq ta plinh hòim . ⁹ Bìh kàn aih la bìh calah nèh , yiniq haq aih kan kiac , aih Satan, ma ti lam padô òiq òng ka phù cròng , khoe jah caqnìh òac haq ta crõng taneh xam bua da haq hadai .

¹⁰ Au tàng hòim ta tróc i bàu capoch òeh :

“ Manòeq kan òeh claih, kan òeh , xam diac da Boc Plinh bèn ,

khoe trùh pajùm xam cwiang itai Christ da Haq ;

majah qmang aih mangai ma òh xam òamang toq ti enh tah hadrah ka haq enh ngèa ka Boc Plinh , manòeq kò khoe jah caqnìh òac .

¹¹ Wì khoe jah blêq haq xi mahim Kon trùu xam bàu panhìn da cla , wì ùh adênh òeh kan rih trùh qmòe jò cachit . ¹² Qmang aih òiq ka plinh xam pì ma oe ta aih, òrah lem bùi beq ! Habo òeh ka taneh xam diac raxìq ! Majah qmang aih kiac dù loq jò da haq oe pì pang leq hòim , òai haq majah trùh ta pì rai nòeh pì cajaq .

¹³ Jò bìh hnoq raðeh khoe òiq khwênh caqnìh ta crõng taneh , haq òrah qnat tiaq mangai gucadri ma khoe hauang kon calô . ¹⁴ Yàng khoe jah am ka gucadri aih panan cliang kàn , òeq hu pan mùt tanòe hawit aih nòe Boc Plinh palauq òeq ka haq amot ; ta aih haq jah ban mòeq jò , bàc jò , qne jò , claih hangai ka bìh . ¹⁵ Jò aih bìh pròh diac enh həcùng haq tìah qmòe ka diac kàn hnan tiaq mangai gu cadri , òeq hu qmoch òac haq ta diac . ¹⁶ Mahaq taneh òh yõc gucadri ; majah qmang aih taneh hah həcùng lõnh diac bìh ma khoe capròh loh enh həcùng . ¹⁷ Bìh nòeh ka mangai gucadri , haq lam tablêq ataq wì kon maqnoeq da gucadri , aih bài mangai ma wèq tiaq ranenh Boc Plinh rai rùp cajaq bàu panhìn da Jesus Christ . ¹⁸ Bìh yòng ta braih diac raxìq .

Baiq toq ngè rih ma xòc tóc enh diac raxìq

13

¹ Khoe aih , au hnoq enh diac tóc mòeq ngè rih i mòeq jàt toq haki xam tapèh toq gàu, ta bài haki aih i mòeq jàt toq cadoh bùa , rìm toq gàu òiq i achih yiniq xam bàu capoch ùh hòq ka Boc Plinh . ² Ngè rih au ma hnoq aih tìah taiq ka òeo ; jo haq tìah ka jo hìgàu , həcùng haq tìah ka həcùng

sutùh . Bìh rông yǒc deh kan dēh , xam gèq am ka ngè rìh aih . ³ Ta bài gàu aih i moeq toq gàu habau tìah taiq ka khoe cachit ; yàng èh habau aih jah brēh , diq ka crǒng taneh loh ka hamàih lam tiaq dǒng haq . ⁴ Kon mangai kùh waiq bìh rông majah qmang aih haq khoe yǒc kan itai am ka ngè rìh aih; wì hadai kùh waiq hloe ngè rìh aih , wì doe “ Cabô diang ngè rìh kô , cabô hlàt tablêq ka haq ?” . ⁵ Khoe jah am ka ngè rìh aih hacùng xam bàu loq catèh , bàu capoch qmèq Boc Plinh ; haq i cwiang tabroq qmang aih ta pôn jàt baiq khê . ⁶ Ngè rìh aih hah hacùng capoch ùh hòq ka Boc Plinh , capoch qmèq ka yiniq haq , ka hnim Ranòh kùh waiq haq , capoch troq hloe wì ma oe ta plinh . ⁷ Khoe caqnaih ka haq i cwiang hu tajêh ka bài mangai hadròeh ,haq jah blêq wì . Haq i cwiang broq gàu rìm nang noe , rìm ngai, rìm bàu capoch , rìm diac . ⁸ Dìq ka mangai oe ta crǒng taneh ma kùh waiq haq , aih bài mangai ma ùh jah achìh yiniq ta hset kan rìh da Kon Triu ma khoe cachit qmòe enh jò baxèm broq plinh crǒng taneh .

⁹ Cabô i don , tamàng beq ! ¹⁰ Tàng cabô rùp mangai broq dic , aih èh cla haq ep broq dic ; tàng cabô jêh mangai xi chang, aih èh cla haq ep cachit xi chang . Kô raq kan chiùq àt xam manoh lùl da mangai hadròeh.

Ngè rìh ma atiq tǒc enh taneh.....

¹¹ Khoe aih au hnoq enh taneh tǒc mòeq toq ngè rìh maqnoeq hòh , i baiq toq haki qmang ka haki kon triu , mahaq capoch bàu qmang ka kon rông . ¹² haq hanoh yǒc cwiang da ngè rìh ma adroe, enh ngèa ka ngè rìh aih , haq thê taneh xam mangai oe ta aih ep kùh waiq ngè rìh ma adroe , aih ngè rìh ma i habau ten cachit mahaq khoe jah brēh . ¹³ haq broq bài kan halac kàn, loh qmòe ka thê ùnh enh trǒc clih ta taneh enh ngèa diq ka mangai hnoq . ¹⁴ Haq ti qnùt bài mangai oe ta crǒng taneh xi kan halac ðeh jah broq enh ngèa ka ngè rìh ma adroe ; haq thê wì broq radua qmù ka ngè rìh ka adroe , aih la ngè rìh chang ma khoe broq ka haq loh ka habau hwaq cachit , yàng èh jah rìh hlài . ¹⁵ Ngè rìh ma atiq kô i cwiang hlui qmùt hi hèm ka radua qmù ngè rìh ma adroe ðòeq ka radua qmù aih jah capoch ,hu broq ka rìm ngai ma ùh kùh waiq radua qmù ngè rìh aih ep cachit . ¹⁶ Haq hadai broq diq dǒng ka mangai , yac ka mangai qyoh , mangai kàn , mangai padrǒng mangai pa , mangai broq dic , mangai broq cla , diq ep i teo hadro ta kǒng pah qma , tàng ùh meh ta ngòng , ¹⁷ ùh i cabô jah rot , jah atech cleq tàng joq ùh i ka teo hadro aih , teo hadro aih raq yiniq xam sôq da ngè rìh aih.

¹⁸ Kan rabiaq oe ajang kô : Mangai leq ma loq , drah tình sôq da ngè rìh aih beq ,majah qmang aih , sôq aih la sôq da mòeq ngai raq ; sôq da haq aih la 666.

Kon triu xam bài mangai jah dèch

14.

¹ Au ngan hnoq, Kon Triu yòng ta wang Siôn, i 144000 mangai yòng ti haq , diq i yiniq Kon Triu xam yiniq Baq achìh ta ngòng wì haq . ² Au tàng i bàu loh enh plinh, tìah qmang ka bàu diac kàn , qmang ka hilùng dēh ; bàu au ma khoe tàng tìah ka bàu broc wì ma rawêh . ³ wì calêu ðoe calêu maneo enh ngèa ka Gèq bùa , enh ngèa ka pôn toq ngè rìh xam bài wì gucraq . ùh i cabô loq ka ðoe calêu aih enh gùng ka 144000 mangai ma khoe jah baxon yǒc hlài enh crǒng taneh . ⁴ Bài wì aih qnhòq lah kùl oe ti gucadri , majah qmang wì haq diq oe raq sriu . Kon Triu lam pang leq wì

kô tiaq pang aih . Bài wì aih khoe jah baxon yôc hlài enh qne kon mangai ðòeq broq plì ramua hu ðèch am ka Boc Plình xam Kon Triu ; ⁵ ùh i mòeq nà amòng ta bàu wì haq , ùh i nòe hu cwò .

Piq bình plình anoe qnoh kan hadrah da Boc Plình .

⁶ Khoe aih, au hnoq bình plình maqnoeq pan qne trôc , i Bàu lem mòeq ðòeq hu bahia am ka mangai rih ta crông taneh, ka rìm diac , rìm gùng , rìm nang noe , rìm bàu capoch . ⁷ Haq capoch cadêh “ Khòh iu yùq ka Boc Plình , rai broq qngah yiniq haq , majah qmang aih kan hadrah da haq khoe trùh ; drah kùh waiq Mangai ma broq loh plình taneh , diac raxìq xam bài goe diac .

⁸ I mòeq bình plình hatia , tiaq atiq rai doe “ Babilôn kàn tau , khoe ralàih , khoe ralàih , majah qmang aih haq i am ka rìm diac ôq alac tango mahau da haq” .

⁹ I moeq bình plình qnoeq hòh , aih bình plình ma piq , tiaq atiq , capoch dêh rameh “ Tàng cabô kùh waiq ngè rih xam radua qmù haq , i teo hadro da haq ajang ngòng , ajang kông , ¹⁰ mangai aih èh hadai jah ôq alac kan nòeh ùh clai da Boc Plình ma hnhinh ta chrông mahau da haq ; jah baxa ta ùnh liu hwìn oe enh ngèa bài bình plình hadròeh xam enh ngèa Kon Triu . ¹¹ Nhòe da kan baxa wì haq pan tóe mòeq ðòe . Bài mangai ma kùh waiq ngè rih xam radua qmù haq , hloe xam bài mangai ma i teo hadro i yiniq da ngè rih , aih èh xam dahì xam damang ùh i jò leq jah padài .

¹² Kô kan cajap manoh da bài mangai hadròeh : Wì haq wèq ranenh da Boc Plình rai ðiq manoh lùì Chuaq Jesus Christ . ¹³ Khoe ka aih au tàng bàu enh plình doe “ Achih beq ! Pang kô xôq ramot am ka bài mangai cachit aih la mangai ma cachit enh dalam ka Chuaq!Yiang Hadròeh doe: Joq qnàng , majah qmang aih wì haq jah padài ka kan xalep , yiniq abroq da wì haq hanoh jah boe tiaq cla wì” .

Jò gat.....jò gich plì nho.

¹⁴ Au ngan hnoq , i mòeq cato yùc taboc ; haqngui enh qnhèq ka yùc aih i mòeq ngai tiah ka kon da mangai , tagàu i cadoh bùa broq xi wang ajang tì haq wê moeq pla haiq hin . ¹⁵ Mòeq bình plình qnoeq loh enh hnim kùh waiq , yôc bàu dêh crêu ka haq ma haqngui ta yùc “ Drah caqnih haiq hin ìh qmat ðòeq hu gat ; majah qmang aih khoe trùh jò gat, ðùng ruàng ta taneh ðùm khoe ðiq” . ¹⁶ Mangai ma haqngui ta yùc caqnih dèh pla haiq ta taneh , èh ta taneh jah gat ðong .

¹⁷ Mòeq bình plình qnoeq loh enh hnim kùh waiq hadai wê haiq hin . ¹⁸ Èh mòeq bình plình qnoeq hòh i cwàng wèq ùnh ,loh enh nòe prang kùh waiq , dêh bàu crêu ka bình plình wê haiq hin “ Caqnih haiq hin da ìh qmat beq , hu gat bài raqnhi plì nho ta taneh majah qmang aih nho khoe ðùm . ¹⁹ Bình plình caqnih pla haiq hin ta taneh , gat ðong plì nho ta taneh hwênh tah ta apau panòeh kàn da Boc Plình . ²⁰ Apau aih ep len enh gùng ka plài kàn , i mahim ta-ùc loh enh apau aih , mahim aih hlèp qmòe ka qnhàng axêh , hìu clàng hangai jah mòeq muàn tadrâu hrinh Êt-taô (*) .

15

¹ Au hnoq ta trôc i mòeq kan halac maqnoeq , joq kàn joq ramòt qnàng : tapèh bình plình wê tapèh kan ranàc pulùch , majah qmang aih bài kan ranàc kô èh men jah broq ka Boc Plình brêh ka kan nòeh.

² Au hnoq i cleq meh tiah ka diac raxìq hliang raplênh troeq guàng qngah pajùm ka ùnh , bài mangai ma khoe blêq ka ngè rih xam radua qmù haq , hloe xam sôq yiniq da haq, yòng ti haqmai diac raxìq hliang qmang ka guàng aih . Wì haq wê broc da Boc Plinh . ³ wì calêu bàu calêu da Môise aih hapõng da Boc Plinh xam bàu calêu da Kon Trùu:

“ Chuaq da nhèn aih Boc Plinh diq jaq i cwìang itai ,

yiniq broq da ìh joq kàn joq halac qnàng ,

waiq Bùa da rìm taneh diac

Trong da ìh aih diq taq atoq , diq joq qnàng ,

⁴ Waiq Chuaq nhèn, cabô ma ùh iu yùq, ma ùh dèch bàu manè yiniq ìh ?

Majah qmang aih mòeq ngai ìh raq ma hadròeh , rìm diac, diq trùh hacùn cràng kùh waiq enh ngèa ìh ,

Majah qmang aih biac broq taq atoq da ìh , khoe jah paqnoh .

Tapèh chrõng panòeh da Boc Plinh .

⁵ Khoe aih au ngan , hnoq ta tróc i nòe hadròeh da hnim ranòh tajao tapèch. ⁶ Tapèh bình plinh wê tapèh toq doe chrõng kan ranàc loh enh hnim kùh waiq , caxùnh eo bai briang hadròeh qngah qngai , kàt caxi caqnam broq xi wang . ⁷ Mòeq ta pôn toq ngè rih qnèp ka tapèh bình plinh tapèh toq doe chrõng broq xi wang, ta aih tah bình kan nòeh da Boc Plinh aih Mangai rih halinh mòeq òe . ⁸ Hnim kùh waiq bình òng nhòe loh enh kan ranhòm Boc Plinh xam cwìang itai haq ; ùh i mangai leq jah mùt ta hnim kùh waiq aih trùh jò leq tapèh kan ranàc kàn da tapèh bình plinh jah broq gèh .

Tapèh ranàc atiq lùch ùc qnoh ta crõng taneh

16

¹ Khoe aih , au tàng bàu dèh loh enh hnim kùh waiq doe ka tapèh bình plinh “ Drah lam , ùc qnoh tapèh doe chrõng kan panòeh da Boc Plinh loh ta crõng taneh beq” .

² Bình plinh ma adroe ùc deh doe chrõng loh ta crõng taneh , bài mangai ma kùh waiq radua qmù rai i teo hadro da ngè rih , loh òng ka pa-êh ra-om jìq .

³ Bình plinh ma baiq , ùc doe chrõng da haq ta diac raxìq , diac raxìq wìh wìa mahim , tiah ka mahim mangai cachit ; rìm yiniq ma rih ta diac raxìq cachit diq òng .

⁴ Bình plinh ma piq , ùc doe chrõng da haq loh ta diac xam goe diac , diac wìa òng mahim.

⁵ Au tàng bình plinh ma wèq diac doe

“ Chuaq joq taq atoq , Ìh aih Mangai qnang i , khoe i enh nèh ,

Ìh Mangai hadròeh khoe hadrah crõng taneh kô ;

⁶ majah qmang aih wì haq khoe broq dahròq mahim mangai hadròeh xam bài mangai pajàu ,

Ìh khoe am wì haq ôq mahim : aih joq ra-òh qnàng” . ⁷ Au tàng enh prang kùh waiq i bàu doe :
“ Joq waiq Chuaq aih Boc Plình i cwiang itai rìm trong ,

bài kan hadrah da Ìh òi taq atoq , òi joq qnàng”.

⁸ Bình plình ma pôn ùc deh doe chrông ta mat mahì, mat mahì jah cwiang bùh ca-et kon mangai . ⁹ Kan tôq broq ka kon mangai loh ka ca-et dõng , wì haq capoch qmèq hloe ka yiniq Boc Plình aih Mangai ma i cwiang enh qnhèq dõng ka bài kan ranàc aih, wì haq hadai ùh raxach òeq hu dèch kan ranhòm ka Boc Plình .

¹⁰ Bình plình ma padam ùc deh doe chrông ta gèq da ngè rìh , òi da haq aih hi loh ka clam cluiq , ta kan òi kon mangai loh ka ti kap deh rapet . ¹¹ Ta kan òi, kan pa-êh , wì haq ti capoch qmèq ka Boc Plình oe ta plình , wì haq dua ùh raxach dèh trong qmèq òeh ma khoe broq .

¹² Bình plình ma tadrâu ùc deh doe chrông ta crông òi Ôphorat; òi aih loh ka xot croh , òeq padon trong lam am ka bài bùa enh apah mat mahì tõi . ¹³ Khoe aih au hnoq enh hacùng bìh rông, enh hacùng ngè rìh , enh hacùng pajâu qnùt loh piq toq kiac dù , tìah taiq ka bài kìt. ¹⁴ Aih raq kiac da Satan , broq bài kan halac, lam trùh ta bài bùa ta crông taneh òeq tagop ti dabau hu padon òeq kan tajêh ta hi kàn da Boc Plình ma òi jaq itai .

¹⁵ “Ngan oq ! Au trùh tìah ka mangai atùng. Xôq ramot am ka mangai hmàng hamang rai wèq dèh eo, òeq ùh lam chac dech òi wì qnoeq ùh hìah hnoq deh kan camaih” .

¹⁶ Wì tagop da bau oe mòi nòi , tìah bàu Hêbru ajang aih wì crêu Hamagêdon .

¹⁷ Bình plình ma tapèh ùc deh doe chrông ta cayêu , aih i bàu capoch dèh enh hnim kùh waiq ,loh enh nòi gèq bùa doe “ Khoe gèh”. ¹⁸ Draq adrinh hloe jò aih i kan camlet cađah, atêh hi gruàng , bàu hìlùng xam kan ralàng dèh ta crông taneh , taneh ralàng dèh òi jaq enh jò baxèm i kon mangai trùh manòeq qnhòq lah i qmang aih . ¹⁹ Plài Kàn tapah loh piq, plài da òi wì ralài clih dõng, Boc Plình hmàng trùh Babilôn kàn òeq hu pangoc ka haq chrông panòeh . ²⁰ Bài pleo òi amot dõng, bài bui wang pi oe hnoq hòm . ²¹ Bài cato preo kàn , trap mòi talàng , enh tróc clih tùc kon mangai , taiq kan ranàc tróc clih preo aih , kon mangai hi capoch qmèq ka Boc Plình, majah qmang aih kan ranàc aih ramòt joq qnàng .

Kan hadrah ka Babilôn kàn....

17

¹ Jò ta tapèh bình plình ma wê doe chrông , aih i mòi bình plình thia haten doe ka au “ Lam ajang kò , au hu patô am ka ìh hnoq kan hadrah ka mangai gucadrì tango kàn , haq ma haqngui enh qnhèq ka bài crông òi kàn tau . ² Bài bùa oe ta crông taneh tango ka haq , mangai ma oe ta crông taneh hadai bùbia ka alac tango haq .

³ Khoe aih , bình plình hi aràng au lam enh dalam ka Yiang Hadròeh haq qnung trùh tanoè hawit; au hnoqmangai gucadrì haqngui enh crông mòi toq ngè rìh gòh tabrùng , ta chac haq achih toq yiniq bài bàu capoch ùh hòq ka Boc Plình , i tapèh toq gàu xam mòi jàt toq haki . ⁴ Mangai gucadrì aih caxùnh eo gòh ngùi . Anì toq bài wang , hmo canaq , ngóc, ajang tì haq wê

moeq toq doe chrõng wang bình toq kan trùq ,kan tango amùà . ⁵ ajang ngòng achìh mòièq toq yiniq rameh :

Kan hlèp da Babilôn kàn ,

aih miq bài mangai tango

xam bài kan amùà trùq ta crõng taneh .

⁶ Au hnoq mangai gucadri aih bùbia ka mahim bài mangai hadròeh xam mahim mangai cachit ka Chuaq Jesus Christ ; au hnoq loh ka hamàih .

⁷ Bình plình bóch au “ Gleq ìh majah hamàih ? Kô au hu anoe ka ìh loq kan hlèp da mangai gucadri xam ngè rih ma chò haq , aih ngè rih ma i tapèh toq gàu xam mòièq jàt toq haki . ⁸ Ngè rih ìh ma khoe hnoq , adroe aih khoe i ,yàng manòeq kô khoe pi i ;kô èh haq jah tõi enh hwinh jrùq khoe aih lam trùh ta kan lũng pac ; bài mangai oe ta taneh aih bài mangai ma ùh i achìh yiniq ta hset kan rih enh jò broq plình crõng taneh , hnoq ngè rih aih wì hamàih , majah qmang aih , nèh haq khoe i , manòeq kô pi i ,yàng èh atiq aih ka doe haq jah trùh hòm . ⁹ Ajang kô ep i manoh rabiaq ka hèm: Tapèh toq gàu aih tapèh toq bui wang gucadri aih ma haqngui enh qnhèq . ¹⁰ Aih hadai tapèh toq bùa ; padam ngai adroe khoe taclìh , mòièq ngai aih qnang i manòeq , mòièq ngai hòm qnhòq trùh ; jò haq aih hi jah trùh , haq hadai ùh oe dùnh pang leq . ¹¹ Ngè rih ma khoe i adroe yàng manòeq pi i , aih raq bùa ma rahem ; haq aih hadai mòièq bùa ka tapèh bùa tau , haq hadai lam trùh ta kan lũng pac . ¹² Mòièq jàt toq haki aih mòièq jàt toq bùa qnhòq jah waq deh diac ; mahaq wì haq wiang broq bùa pajùm ti ngè rih dù tau ta mòièq jò raq . ¹³ wì haq pajùm mòièq manoh òeq jao dõng deh cwiang am ka ngè rih dù xòc . ¹⁴ Wì tajèh ka Kon Trùu , Kon Trùu blèq wì haq ,majah qmang aih haq aih Chuaq da bài chuaq , Bùa da bài bùa ; bài mangai ma khoe jah crêu, mangai khoe jah ràih xam bài mangai ma ùh tablòq manoh diq jah oe pajùm ti Kon Trùu , hadai jah wiang blèq.

¹⁵ Khoe aih ,bình plình doe hòm ka au “ Bài cròng diac ìh ma khoe hnoq i mangai gucadri tango haqngui enh qnhèq , aih bài nang noe , bài mangai bàc ,bài diac xam bài bàu capoch . ¹⁶ Cla ngè rih xam mòièq jàt toq haki ìh ma khoe hnoq atiq èh wì hi git ka gucadri tango , wì haq wìh hlài raliang đac rai broq ka haq loh ka talùch , nhah jam haq rai bùh haq ta ùnh . ¹⁷ Majah qmang aih Boc Plình khoe òeq wì aih broq tiaq manoh Haq ma enh , jò Haq broq ka wì aih mòièq manoh ti dabau òeq jao dõng deh cwiang am ka ngè rih tau , trùh jò bàu da Boc Plình jah xit . ¹⁸ Mangai gucadri ìh ma khoe hnoq , aih raq plài kàn wèq cwiang enh qnhèq ka bài bùa ta crõng taneh .

Raliang đac Babilôn kàn

18

¹ Atiq ka bài yiniq aih , au hnoq mòièq bình plình loh enh plình , haq i cwiang kàn, kan ranhòm haq srêu qngah qngiang ta crõng taneh . ² Haq creo ka dèh “Babilôn kàn khoe ralàih , khoe ralàih! Plài kàn aih khoe wìa nòe oe da kan kiac , nòe trom nòe kòp da jròng , kòp da bài adrech chìm qmèq qmac kon mangai ma cadròt ka hnoq , ³ Majah qmang aih rìm diac khoe bù ka alac tango anang da haq , bài bùa ta crõng taneh khoe tango ti haq , bài mangai padro ta crõng taneh khoe jah padrõng kan enh kan loq racaih da haq .

⁴ Au tàng i bàu qnoeq enh trồc doe rameh

“ Diq ka mangai da Au , drah loh ma khoe ka Babilon ,

Tabeq rayeq èh pì loq wiang poh yiniq lui ti haq ,

loq ep wiang pòq kan ranàc ti haq .

⁵ majah qmang aih yiniq lui da haq qmat haqnhèq khoe trùh ta plinh,

Boc Plinh khoe hmàng trùh kan dù da haq .

⁶ Pì broq hlài ka haq bài yiniq haq ma khoe broq ka mangai qnoeq ,

patem chau ka haq loe baiq yàng ,

clai ka haq loe baiq chrông haq ma khoe clai ka mangai qnoeq .

⁷ Haq catèh rai hnhè rađeh ta kan padrông cla haq dàng leq ,

aih broq ka haq jìq xa chau dàng aih .

Majah qmang aih tacliac haq doe

“Au kô bùa cadri haqngui dèh tagèq ,

ùh xài mangai hadrô , ùh jò leq au hnoq kan crò hmoe” .

⁸ Aih iq dài majah ta mòeq hì raq,

bài kan ranàc kô majah caqnìh enh qnhèq ka haq ,

kan cachit , kan crò hmoe ,kan pangot hrah,

xam ùnh bùh chac haq ;

majah qmang aih Boc Plinh ma hadrah haq ,aih Boc Plinh i padren dèh haraya” .

⁹ Bài bùa ta crông taneh ma khoe tango khoe wiang jah waq kan padrông ti haq hnoq nhòe ùnh
cheo haq aih èh wì toq crò hmoe . ¹⁰ Yùq loq ep wiang pòq kan xalep ti haq , wì toq yòng
haqmiang enh hangai rai doe

“ Habo qnàng , habo qnàng ,Babilôn aih plài kàn ,

plài padrông tau! Bu mòeq jò raq , kan hadrah gè khoe trùh” .

¹¹ Bài mangai padro ta crông taneh hadai mangò crò hmoe ka haq, majah qmang aih pi oe i cabô
rot dahwèq rađeh hòm . ¹² Dahwèq aih bài :wang ,bac ,hmu lem ,ngốc , bai habuàt , bai gòh , bai
lùaq , bai drinh ; bài long xua thùm ; bài dahwèq broq xi bla roeh , long canaq , òng ,mem, hmo
.¹³ Cwèq , tiau , dầu , janh xua thùm , gahnàu , alac , dầu oliu ,bài dác lem, hmau phi , ò , trùu ,
axêh xam xê axêh , hapông díc , hloe xam mahua yiang kon mangai . ¹⁴ wì doe

“Bài plì manoh ih ma toq tangèh chaq hnhung khoe diq ,

kan qngah padrõng rahù ìh khoe lùch , chaq ma oe hnoq” .

¹⁵ Bài mangai padro aih canòm ka Babilôn khoe loh ka padrõng kan , diq yòng enh hangai , wì yùq rađeh loq ep wiang xalep ti haq ; wì crò hmoe rai mangò ka haq ,wì doe ¹⁶ “ Hào hrình ,hào hrình , ka plài kàn tau ,

khoe hmaq atàc toq bai habuàt gòh ngùi ,gòh drinh,

anì qngah qngiang toq wang , toq ngoc ,toq hmu canaq !

Ta mòeq rahyàc raq , kan padrõng rahù ranhòm aih hnhung đồng khoe diq!”.

¹⁷ Mangai wèq boang , mangai lam trong diac , xam mangai oe ta boang, bài mangai padro ta diac raxìq, diq yòng enh hangai,¹⁸ jò wì hnoq nhòe ùnh cheo haq , wì cachech “ I plài leq kàn dàng plài kô!” ¹⁹ Wì haq yóc blo raid deh tagàu , crò hmoe adênh ka haq ,wì doe “ Hào hrình ,hào hrình qnàng ! Haq kô khoe yóc kan padrõng rađeh òeq broq ka rìm mangai i boang ta diac raxìq jah padrõng kan ðeh diq , ta mòeq rahyàc raq khoe wìa nòe hawit .

²⁰ “Diac Plinh , ìh drah bùi lem ka haq beq

Pì mangai hadròeh, lem bùi beq

Mangai pajàu , bài mangai tiaq cla ,bùi beq

Majah qmang aih jò Boc Plinh hadrah gucadrì aih .

Haq khoe broq kan taq atoq am ka pì”

²¹ Khoe ka aih , mòeq bình plinh ðeh padren yóc mòeq toq hmo qmang ka apau kàn khwênh caqñih ta diac raxìq, haq doe

“Plài kàn Babilôn tau èh ,

hadai ep khwênh caqñih cadêh qmang kô èh diq,

aih èh pì cabô oe hnoq haq hòm.

²² Pì i cabô oe tàng bàu rawêh broc , bàu hlui ken bàu hlui taliaq enh nòe haq hòm .

Ta ìh kô yac ka padro cleq dua pì ka mangai patìh kaq kùng ,

bàu apêh qmau dua pì tàng.

²³ Qngah ðen pì sreo ta ìh hòm,

wì pì oe tàng bàu ổng mai neo taqnèp ,

majah qmang aih bài mangai padro ti ìh aih diq bài gucraq ta crõng taneh ,

Canàih ìh khoe pawè đồng mangai rìm diac .

²⁴ Tacô wì chaq hnoq mahim bài mangai pajàu , mangai hadròeh

xam diq đồng mangai ta crõng taneh, ìh khoe jêh ðac ka cachit” .

Calêu manè jò Babilon khoe ralàih.....

19

¹ Khoe ka bài yiniq kô , au tàng i bầu dêh tiah ka bầu da mangai bàc haraya

“ Alêluja !

Kan dèch claih, kan ranhòm , kan dèh padren dìq oe ta Boc Plinh bèn.

² Majah qmang aih kan hadrah da haq dìq taq atoq, dìq joq qnàng .

Haq khoe hadrah mangai gucadri tango kàn aih,

Mangai ma khoe yõc deh kan tango broq raliang dõng ta crõng taneh ,

Haq khoe taboe hlài mahim da bài hapõng haq

khoe ta-ùc ajang tì kõng mangai gucadri tango kàn aih”

³ Wì calêu hòm yàng ma atìq

“Halêluja! Nhòe da haq pan tõi yõt mòeq đòe” .

⁴ Baiq jàt pôn ngai gucraq hacrùn cràng haqneq kùh waiq Boc Plinh aih Mangai ma haqngui tagèq, wì doe

“Amen , Halêluja!”

⁵ Draq adrinh hloe jò aih enh nòe gèq bùa i bầu doe

“Dìq dõng ka pì aih mangai hapõng Boc Plinh ,

aih bài mangai ma loq iu yùq ka Haq , yac ka mangai qyoh mangai kàn hadai ,

drah calêu manè apôi Haq”.

⁶ Khoe aih, au tàng hòm bầu tiah ka bầu mangai bàc haraya, ùh i crài cleq ka bầu diac kàn, bầu cađah dêh, bầu aih doe rameh

“Halêluja ! Chuaq aih Boc Plinh bèn,

aih Mangai i cwiang rìm trong ,khoe broq bùa.

⁷ Beq bèn lem bùi , beq bèn apôi ,

padèch kan ranhòm ka Haq;

Majah qmang aih hì taqnèp da Kon Triu khoe trùh , mai da Haq hadai khoe palàng rađeh,

⁸ Khoe jah caxùnh eo taboc chah ma raplênh broq xi bai habuàt” (bai taboc aih yiniq broq da bài mangai hadròeh)

⁹ Bình plinh doe ka au

“Achih beq, Joq xôq ramot qnàng ka mangai majah akhen trùh acaq yiniang taqnèp òng mai da Kon Triu !”

Haq anoe hòm “ Aih diq bài bầu joq qnàng da Boc Plinh” .

¹⁰ Au hacùn cràng ta haqneq ka jènh haq òeq hu kùh waiq , mahaq haq doe ka au “ Apa q broq qmang kô , au hadai mangai hapõng tiah ka ìh ,qmang ka bài oh daq ìh, hanoh wèq bầu òeq lam anoe panhìn ka Jesus . Ìh ep kùh waiq Boc Plinh. Majah qmang aih lam anoe panhìn ka Jesus aih la manoh cliac da bài bầu pajàu .

¹¹ Jò aih au hnoq plinh tapèh , i mœq toq axêh taboc : Yiniq mangai kòe axêh aih : “Mangai ùh tablòq manoh xam Mangai capoch jang ”. Haq yœc kan taq atoq òeq hadrah rai òeq tablêq . ¹² Mat Haq tiah ka ùnh , gàu haq i bàc toq cadoh bùa i achih mœq toq yiniq , enh gùng ka cla Haq ùh i cabô loq . ¹³ Haq caxùnh eo tâm ta mahim , yiniq da Haq aih bầu Boc Plinh . ¹⁴ Bài linh plinh diq caxùnh eo habuat taboc , hreo lem, kòe axêh mông lam tiaq Haq. ¹⁵ i mœq pla chang hin loh enh hacùng Haq , Haq yœc chang aih hu tablêq ka bàc diac ta taneh , Haq wèq wì aih xi mœq toq long mem .Haq jôiq len plì nho ta apau , aih apau panòeh da Boc Plinh itai rìm trong.¹⁶ Ta cataih xam ta eo Haq achih mœq toq yiniq “ Bùa da bài bùa , Cra q da bœ Cra q”

¹⁷ Au hnoq mœq bình plinh yòng ta mahì .Haq dèch bầu creô ka bài chìm pan ta trœc , rameh

“Trùh beq , pì tagop dabau trùh acaq yiniang kàn da Boc Plinh, ¹⁸ Acaq jam bài bùa , jam bài cla cra q , jam bài mangai tanoq, jam axêh xam mangai kòe axêh , jam da rìm ngai ,mangai broq dïc jam mangai broq deh ka cla, enh jam mangai qyoh trùh jam mangai kàn” .

¹⁹ Au hnoq ngè xòc xam bài bùa ta crõng taneh xam bình linh wì haq tagop ti dabau hu tajêh ka Mangai kòe axêh xam linh da Haq. ²⁰ Mahaq ngè xòc bìq rùp , bài pajàu qnùt aih mangai khoe broq kan halac enh ngèa ka ngè xòc, canòm ka haq òeq ti qnùt bài mangai ma khoe i teo hadro da ngè xòc rai kùh waiq haq hadai bìq rùp ,diq baiq wa haq oe raq rih mahaq bìq hwênh caqni h tabau ùnh xam liu hwìn cheo dra adrènh . ²¹ wì ma qnoeq diq cachit ka chang maloh enh hacùng Mangai ma kòe axêh , diq dõng bài chìm jah panac ka jam wì aih .

Ta qnhòng mœq mùan hanam.....

20

¹ Atiq ka aih , au hnoq mœq bình plinh loh enh plinh , ti haq wê gahlòng da hwìn jrùq xam mœq hadrang caxi datœq kàn . ² Khoe aih haq rùp bìh kàn , aih bìh dùnh calah nèh , aih kan kiac ,aih Satan , clang kàt òeq haq ta mœq mùan hanam . ³ Haq khwênh caqni h bìh aih ta hwìn jrùq , clòng qmang hwìn jrùq aih khoe èh haq hi nìm padràng , dõq bìh aih pi oe jah lam qnùt bài diac ta crõng taneh hòm , trùh jò leq hi khoe ka mœq mùan hanam . Khoe aih èh ,Satan hadai ep jah caqnaih mahaq ùh dùnh .

⁴ Au hnoq bài gèq , bài mangai haqngui tagèq jah cwiang òeq hadrah . Khoe aih au hnoq mahua bài mangai khoe ep cachit ka wì pot ranõng taiq wì haq lam anoe panhìn ka Chuaq Jesus xam bầu da Boc Plinh , mahua bài mangai ma ùh kùh waiq ngè xòc xam radua qmù haq, ùh waq yœc teo hadro da haq , yac ka tangòng ta kõng . Wì aih jah rih hlài , jah wèq cwiang pajùm ti Christ ta

mòeq mùan hanam. ⁵ Bài mangai cachit ma qnoeq ùh jah rih hlài jò qnhòq khoe ka mòeq mùan hanam. Aih kan rih hlài yàng ma baxèm .

⁶ Joq xôq ramot qnàng , joq hadròeh qnàng ka bài mangai majah kan rih hlài yàng ma baxèm! Kan cachit yàng ma atiq pi oe i cwiang cleq enh qnhèq ka wì haq; mahaq wì aih jah broq pajàu da Boc Plinh xam da Christ, jah hadai broq bùa ti Haq ta mòeq mùan hanam.

⁷ Jò mòeq mùan hanam hi diq, Satan hi jah caqnaih , ⁸ loh enh gùng ka nòe ma clêh , haq lam padô mangai oe jàp jia ta crông taneh , mangai Got xam mangai Magot ; haq gop ahlài wì oe mòeq nòe ðòeq padon tajêh tablah , wì bàc qmang ka braih diac raxìq ⁹ Wì haq lam jàp ta taneh , ti dudanh nòe mangai da Boc Plinh oe xam plài Haq ma loq waq deh . Mahaq i ùnh enh plinh loh bùh wì haq cachit ðong . ¹⁰ Satan aih mangai ma ti padô wì haq aih èh jah caqnih ðac haq ta bau ùnh xam liu hwìn , ta aih khoe i ngè rih xòc xam bài pajàu qnùt . Wì haq ep chiùq kan baxa xam dahì xam damang trùh hloe mòeq ðoe.

Kan hadarah ma atiq lùch

¹¹ Khoe aih au hnoq mòeq toq gèq taboc kàn xam Mangai ma haqngui ta aih , enh ngèa Haq tróc taneh amot ðong , pi hnoq nòe ajang leq ðòeq ka wì haq hòm. ¹² Au hnoq mangai cachit xam kàn xam qyoh , diq yòng enh ngèa ka nòe hadrah , bài hset diq tapèch . Èh i mòeq toq hset qnoeq hòm , aih hset kan rih ; mangai cachit jah hadrah tiaq deh trong wì haq ma broq , wop qmang ka bàu achih ta hset aih. ¹³ Diac raxìq padreo mangai cachit ma oe ta haq ; Kan cachit xam Hwin hadai padreo hlài mangai cachit oe ta haq . Rìm ngai wì aih chiùq jah hadrah tiaq trong ðeh ma broq . ¹⁴ Khoe ka aih , Kan cachit xam Hwin , hadai jah caqnih ðac ta bau ùnh. Bau ùnh aih raq kan cachit yàng ma atiq . ¹⁵ Mangai leq ùh jah achih yiniq ta hset kan rih , ep hwênh qnih diq ta bau ùnh .

Jerusalem maneo

21.....

¹ Khoe aih au hnoq tróc neo xam taneh neo, majah qmang aih tróc xam taneh ma adroe khoe hnhung , diac raxìq hadai pi i.

² Au hadai hnoq Plài Hadròeh , aih la Jerusalem maneo enh plinh , loh enh Boc Plinh, khoe padon qmòe qmang ka mai neo taqnèp anì dèh ka òng. ³ Au tàng i bàu dèh loh enh nòe gèq doe rameh “ Hacô! Ranòh kùh waiq da Boc Plinh oe qne kon mangai, Haq oe ti wì , wì jah broq mangai da Haq ; cla Boc Plinh jah oe ti wì ⁴ Haq xùt hreo diac mat enh mat wì , pi oe i kan cachit , kan mangò ,bàu crò hmoe , kan jìq xa hòm , majah qmang aih bài yiniq ma adroe khoe pi i.

⁵ Mangai haqngui tagèq doe “ Au broq neo hlài rìm yiniq ”. Haq doe hòm “Achih beq, majah qmang aih bài bàu kô diq khòh lùì , diq joq qnàng”. ⁶ Haq doe ka au “Khoe gêh ! Au kô Anpha xam Ômega, aih la baxèm xam pulùch . Cabô croh ranông , Au yóc thông diac kan rih ðòeq am dech ka haq . ⁷ Mangai leq blêq hi jah bài yiniq aih ðòeq broq kùng hang , au jah broq Boc Plinh da mangai aih , haq aih jah broq kon da au. ⁸ Bài mangai ma lèu , mangai ma ùh lùì , mangai jiang ka ramòt , mangai jêh ðac mangai , mangai tango anang , mangai ti pàih panàih blài blông ,

mangai kùh waiq radua qmù, xam mangai capoch amòng , nòe da wì haq aih bau ùnh xam liu hwình khàng ma adrènh : Aih raq kan cachit yàng baiq.

⁹ Mòeq ta tapèh ngai bình plình ma khoe wê tapèh toq doe chrõng kan ranàc, thia haten doe ka au “ Trùh ajang kô beq , òeq au patô ka ìh hnoq kon mai, aih mai maneo ban da Kon Triu” . ¹⁰

Khoe aih ta phàn yiang, bình plình aih qnung au lam tồc ta bui wang kàn haqnhèq , patô ka au hnoq Plài Hadròeh , aih la Jerusalem , enh plình, loh enh Boc Plình , ¹¹ qngah qngiang kan ranhòm da Boc Plình . Kan ca-ah ca-iang da plài aih tìah qmang pliang hmu ngốc ma canaq bac , qmang ka ngốc hmu lang hliang ma raplênh. ¹² Haq i panàt haqnhèq, i mòeq jàt baiq toq qmang , xam mòeq jàt baiq bình plình ajang trong qmang , enh qnhèq ka qmang achìh yiniq da mòeq jàt baiq nang noe Isorali. ¹³ Panàt pah mat mahì tồc i piq toq qmang , enh pah qngeo i piq toq qmang, enh pah qma i piq toq qmang , enh pah mat mahì clih i piq toq qmang. ¹⁴ Panàt plài aih i mòeq jàt baiq toq hmu xem , ta aih achìh yiniq da mòeq jàt baiq ngai Tiaq cla da Kon Triu .

¹⁵ Bình plình ma capoch ka au tì haq wê mòeq toq long maneh aih long triang niaq broq xi wang òeq wêh plài aih , wêh bài qmang xam panàt plài . ¹⁶ Plài aih pôn bè daq adàng , dang gat dang yôh taq atoq ka dabau. Bình plình wêh plài aih xi catoch triang niaq : Plài aih jah mòeq jàt baiq mùan êtado, dang yôh , dang gat , dang yàng òiq taq atoq . ¹⁷ Haq wêh panàt plài bè habàu jah : Mòeq hrinh pôn jàt pôn cuê , aih maneh wêh da bình plình , hadai maneh wêh da kon mangai . ¹⁸ Panàt broq xam ngốc hmu lang , plài aih broq xam wang , hliang raplênh qmang ka guàng . ¹⁹ Jo xem panàt plài aih broq toq xi hmu canaq. Xem ma adroe aih xam hmu lang , xem ma atiq aih xi hmu ngốc saphia , xem ma piq aih xi hmu ngốc mainao , xem ma pôn aih xam hmu ngốc nget , ²⁰ xem ma padam aih xi hmu mainao gòh drinh , xem ma tadràu aih xi hmu rubi ; xem ma tapèh aih xi hmu ngốc ngèq ngèq , xem ma rahem aih xi ngốc thìh thuàng , xem ma hachin aih xi ngốc gòh nget , xem ma mòeq jàt aih xi ngốc xênh , xem mòeq jàt mòeq aih xi hmu ngốc gòh, xem mòeq jàt baiq aih xi hmu lang gam ²¹ Mòeq jàt baiq toq qmang broq xi mòeq jàt baiq pliang ngốc, rìm toq qmang òiq broq enh cato ngốc. Trong lam ta plài òiq broq xam wang, hliang qmang ka guàng. ²² Ta aih au ùh i hnoq mòeq toq hnim kùh waiq leq , majah qmang aih Boc Plình i cwàng itai rìm trong xam Kon Triu aih raq hnim kùh waiq da plài aih . ²² Plài aih hanoh ùh hiaq ep waq ka i mat mahì , mat khê òeq sreo qngah; majah qmang aih i kan ranhòm da Boc Plình sreo qngah qngiang , Kon Triu aih raq òen da plài aih . ²⁴ Bài diac wì lam tiaq kan qngah plài aih , bài bùa ta crõng taneh aràng deh kan nhòm nhình qmùt ta aih, ²⁵ Bài qmang ta plài aih dahì ùh clênh majah qmang aih ta aih ùh i ka damang . ²⁶ Kan rahù ranhòm da bàc diac jah aràng qmùt ta aih, ²⁷ mangai ùh hadròeh, mangai broq trong qmèq , mangai loq qnùt blinh ùh jah mùt ; mahaq òeq toq ka bài mangai ma khoe jah achìh yiniq ta hset kan rìh da Kon Triu .

*Sôq ramot da mangai jah rài*h

22.....

¹ Bình plình patô am au ngan cròng diac kan rih , hliang raplênh qmang ka ngốc xênh , loh enh gèq da Boc Plình xam da Kon Triu . ² Taqne plài xam baiq bè diac i long kan rih loh pli moeq jàt baiq yàng ta hanam , mòeq khê mòeq yàng loh pli ; bài hla da haq òeq broq brêh ka kon magari .

³ Pi oe bàu capoch hanip hòm , gèq da Boc Plình xam Kon Triu oe qne plài , bài hapõng da Haq jah patih òeh ka Haq . ⁴ wì haq jah hnoq hadrò deh Chuaq , yiniq da Chuaq jah oe ajang ngòng

wì haq , pi oe i ka damang hò m , ⁵ Yac ka qngah đên , qngah mahì dua wì haq pi oe ep waq hò m , majah qmang aih i Boc Plinh sreo qngah am ka wì ; wì haq jah broq bà u mòeq đò e.

Bàu pariaq ma atiq lù ch

⁶ Bình plinh doe ka au “ Bà i bà u kô ðì q bà u khò h lù i , bà u joq qnàng , Chuaq aih raq Boc Plinh da yiang bà i pajà u , khoe thê deh bình plinh haq loh patô ka hapõ ng Haq rì m yiniq ep dra h rên h trù h .

⁷ “Ngan kô Au rên h trù h ! Xô q ramot am ka mangai leq wè q bà u pajà u oe ta hset kô” .

⁸ Au kô Jon, mangai ma khoe hnoq rai tàng bà i yiniq kô. Jò au khoe tàng rai hnoq, au bla op rađeh ta haqneq ajang nò e jèn h bình plinh ma khoe patô ka au bà i yiniq kô , ðò eq kù h waiq haq aih . ⁹ Mahaq bình plinh aih doe ka au “apaq broq qmang qmat! Au kô hanoh hapõ ng qmang ka ì h xam oh ðaq ì h, aih bà i mangai pajà u , xam bà i mangai ma wè q bà u ta hset kô ; Ep kù h waiq toq Boc Plinh” . ¹⁰ Khoe aih haq doe hò m ka au “Ừ h ðù h nì m padràng ðò eq bà i bà u pajà u ta hset kô, majah qmang aih jò khoe haqnap” . ¹¹ Mangai ma broq trong ù h troq, ðò q da haq broq kan ù h troq hò m, mangai ma amù a trù q ðò q da haq rì h tiaq deh kan trù q amù a hò m, mangai ma broq trong taq atoq , ðò eq haq broq trong taq atoq hò m , mangai leq hadrò eh kiang haq rì h tiaq kan hadrò eh hò m” .

¹² “Ngan kô Au rên h trù h rai wê kan baha lam ti au , ðò eq baha tang ngai tiaq trong wì haq khoe broq . ¹³ Au kô Anpha xam Ômega , aih kan Adroe xam kan Atiq ðò ng , kan Baxèm xam kan Pulù ch ¹⁴ Xô q ramot am ka mangai leq rù h deh eo ðò eq jah taji ka thia ajang long kan rì h , jah lam trong qmang ðò eq mù t ta plài kàn!¹⁵ Bà i koq , bà i mangai loq ti pài h panà i h , mangai tango , mangai jè h mangai , mangai tadreo radua qmù kan kiac , mangai enh xam broq kan patia h , oe ðì q enh gù ng”.

¹⁶ Au kô Jesus, khoe thê ðè h bình plinh trù h panhìn bà i yiniq kô am ka pì enh ngè a ka bà i Tagop Hadrò eh . Au kô rangàu ria h , xinoe da Đawit , Au kô raq halõ ng sroq qngah qngai ”.

¹⁷ Yiang Hadrò eh xam mai neo doe “ Trù h beq ! Mangai leq ma tàng hanoh doe: Trù h beq! Cabô croh ranõ ng dra h trù h . Cabô enh , dra h trù h ðò eq yò c dech ka rađeh ðiac kan rì h.

¹⁸ Au pariaq ka mangai leq ma tàng bà u pajà u ta hset kô : Tàng cabô tah tam cleq ta hset pajà u kô, aih è h Boc Plinh ðè ch tam ka haq kan ranà c ma khoe achì h ta hset kô. ¹⁹ Mangai leq ma cađac ðac qnah yiniq cleq ma khoe achì h ta hset pajà u kô, aih è h Boc Plinh ðò eh ðac hloe phàn ða haq talong kan rì h xam ta plài hadrò eh ma khoe achì h ta hset kô.

²⁰ Mangai panhìn ka bà i yiniq kô , doe rameh “ Joq qnàng ,Au rên h trù h” .- Amen waiq Chuaq Jesus ! ì h rên h trù h beq.

²¹ Waiq kan tabà i h dech da Jesus Christ oe ti rì m ngai! Amen.

(ngày 10/9/2019) 3/ 2/2021 .

Kiểm tra lần cuối vào ngày 23/7/2023